

KA KATASHKUET

Etuat Rich

Uti nikute¹ ishkueu, tshek uiapatak uatashkunu ekue panakunakaik.
Auennua, mashkua etaniti ! Ekue nipaiat nenua mashkua. Tshiuepatuau apishish,
muk^u peikuau e mitshishut. Ui nipaieu nenua unapema, ui tshimakateieu, apu
minuatat.

Tshauepatat ek^u, peminutitishut, tanite mashkua nipaieu.
Eshpish taht anite, apu tshi nipataniti nasht tshekuannu unapema. —
Tshitshipitshitau ek^u ! etikut mani.

Mauat, apu ui tshitshipitshit.
— Eka pitama, iteu, usham mishta-minuaua mita ute uatshiak^u, eka
tshitshipitshitau. Katak^u anite tshipa papamuten, tshipa nipatan put anite
tshekuan.

Ek^u eshpish taht anite : « Tanite ma ititshe ? Tshekuannitshe », itenimeu, «
uet eka ui tshitutet ? » (Apitshissishinua nenua utauassimisha, peikussinua
utauassimisha.) Tshek ekue uapamat
nenua utauassima ne napeu : uiashinu takunaminua. Ekue katuat,
katueu nenu uiashinu tiakunaminiti, ekue kutshishtak. Tshekuannu, mashkua
uiashinu !

¹ Utikute : mekuat nekutet

Minuat uiapannit ekuannu netu-tshissenimat ek^u
utishkuema, tshatutet. Katshi tshitutet, ekue pet takushinit kau,
kiatshimushapamat ek^u. Shash tshitshue shiuenu, shash tshitshue tshimakateu ne
napeu. Shash minaush tshi pimuteu, ekue pet takushinit kau. Ekue unuit ne
ishkueu tshe nikutet. Uieuetashpishut ek^u, ekue tshitutet. Pissik^u muk^u tshituteu,
nenu tshitinam^u pitama uiashashkum. Ekute anite nekatak uatashkut nenu
uiashinu, apu tatak anite uitshit. Ekue nashauat ne napeu. Nete upimeshkanau
ekute uet nashauat. Uiapamat at pitutsheniti niate uatashkut, uatashkunu
pitutshenua. Nenu ma ishkueu pet unuit, shash natiku nenua unapema. Uet
unuitatat uiashashkunu anite uatashkut, mashkua uiashinu uet unuitatat anite.
Ekue tshishuenimikut nenua unapema.

— Eitune ma ! itiku.

Nenu shiatshuapit, shash anite nipaunua unapema.

— Eitune ma, itiku, eka ka ui tshitutein ! Nin minaush
katshi pimuteian, ek^u tshin tshiminu-aiatshin. Tshimut ma an
tshimitshishunashapan ne eitutuin.

— Uauashuanishkashapan ute, iteu.

— Eshe, itiku, uauashuanishkashapan tapue ute. Tshika tshi nishtam
nipune, ua nipain².

Ekute anite nepaikut nenua unapema, ekue utinaminiti nenu uiashashkum.
Tshatshipitshit ashit nenua utauassimisha ne napeu, nete eshpitshit innua etaniti.

² Nin nishtam tshitshi nipaitin ka ui nipain, itiku.